

Þriðjudaginn 8. apríl 1997.

Nr. 3/1997.

Félag íslenskra flugumferðarstjóra

(Gestur Jónsson hrl.)

gegn

fjármálaráðherra f.h. ríkisins

(Einar Karl Hallvarðsson hdl.)

Frávísun. Sératkvæði.

Úrskurður Félagsdóms.

Málið úrskurða Auður Þorbergsdóttir, Gylfi Knudsen, Ingibjörg Benediktsdóttir, Sveinn Sveinsson og Guðmundur Skaftason.

Mál þetta, sem tekið var til úrskurðar 2. þessa mánaðar, var þingfest 26. febrúar sl.

Stefnandi er Félag íslenskra flugumferðarstjóra, kt. 560372-0199, Grensásvegi 16, Reykjavík.

Stefndi er fjármálaráðherra f.h. ríkisins.

Dómkröfur stefnanda:

Að flugumferðarstjórar verði felldir niður af skrá skv. auglýsingu nr. 68/1995, sem birt var á grundvelli 2. mgr. 19. gr. laga nr. 94/1986 um kjarasamninga opinberra starfsmanna.

Þá er krafist málskostnaðar að skaðlausu að mati réttarins, þ.m.t. hækkunar virðisaukaskatts af málflutningsþóknun.

Dómkröfur stefnda:

Aðallega að málinu verði vísað frá dómi.

Til vara að stefndi verði sýknaður af kröfum stefnanda.

Í báðum tilvikum er krafist málskostnaðar úr hendi stefnanda samkvæmt mati réttarins.

Stefnandi krefst þess að frávísunarkröfu stefnda verði hrundið.

Málavextir.

Stefnandi kveður málavexti vera þá að samkvæmt auglýsingu, sem birt var í B-deild Stjórnartíðinda hinn 27. janúar 1995 nr. 68/1995, hafi allir flugumferðarstjórar, bæði þeir sem starfa hjá flugmálastjórn og hjá flugmálastjórn Keflavíkurflugvelli, verið tilgreindir á skrá fjármálaráðherra um þá sem njóta ekki verkfallsréttar vegna starfa sinna við nauðsynlegustu öryggisgæslu og heilbrigðisþjónustu skv. 2. mgr. 19. gr. laga nr. 94/1986 um kjarasamninga opinberra starfsmanna. Í auglýsingunni voru störf flugumferðarstjóra tiltekin með eftirgreindum hætti:

„Stofnun

Starf:

Utanríkisráðuneyti.

Flugmálastjórn, Keflavíkurflugvelli Flugumferðarstjórar, allir
Samgönguráðuneyti.

Flugmálastjórn

Flugumferðarstjórar“

Félag íslenskra flugumferðarstjóra mótmælti skráningu ráðherra á flugumferðarstjórum á framangreindan lista og skutu ágreiningi vegna listans til Félagsdóms. Með dómi 25. september 1995, hafnaði Félagsdómur kröfu stefnanda um ógildingu skráningar flugumferðarstjóra á þeim grunni að samráðs hafi ekki verið gætt við endurútgáfu listans, þar sem dómurinn hafði áður komist að því í máli nr. 3/1987 að félagsmenn stefnanda falli fullkomlega undir 3. tl. 1. mgr. 19. gr. laga nr. 94/1986 um kjarasamninga opinberra starfsmanna. Þá sagði m.a. í niðurstöðum dómsins frá 25. september: „Ekki teljast efni til að líta svo á, að undanþágulistarnir feli í sér víðtækari undanþágur en áður hafði verið ákveðið í ofangreindum dómi Félagsdóms frá 1987, þ.e. þeir „sem starfa sem flugumferðarstjórar“. Stefnandi hefur ekki lagt fram upplýsingar um það, hvaða félagsmenn stefnanda eða hve stór hluti félagsmanna vinna ekki að flugumferðarstjórn, enda þótt það sé ekki hlutverk Félagsdóms að gera skrár skv. 2. mgr. 19. gr. laga nr. 94/1986.

Þegar til þess er litið, að Félagsdómur hefur þegar dæmt að störf flugumferðarstjóra, sem starfa sem flugumferðarstjórar, séu þess eðlis, að þau falli fullkomlega undir 3. tl. 1. mgr. 19. gr. laga nr. 94/1986, verður að telja að stefnandi hafi sönnunarbyrði fyrir því að aðstæður hafi breyst verulega frá því að sá dómur var uppkveðinn. Það hefur stefnandi ekki gert og ber því að sýkna stefnda af kröfum stefnanda.“

Í sama mánuði og dómur þessi féll sögðu allir flugumferðarstjórar starfi sínu lausu, 82 að tölu. Í framhaldi af uppsögnum þeirra sem taka áttu gildi næstu áramót á eftir var undirbúin viðbúnaðaráætlun af hálfu Flugmálastjórnar og Flugmálastjórnar á Keflavíkurflugvelli þar sem gert var ráð fyrir því að einungis hluti flugumferðarstjóra sinnti flugumferðarþjónustu hér á landi. Þá beitti samgönguráðherra heimild sinni í 15. gr. eldri starfsmannalaga nr. 38/1954 og framlengdi uppsagnarfrest 32 flugumferðarstjóra sem áttu að vinna að neyðaráætluninni en uppsagnarfrestur annarra var áfram óbreyttur.

Að sögn stefnanda gefa ummæli í fjölmiðlum á þessum tíma vís-bendingu um að flugöryggi hafi ekki verið stefnt í voða þrátt fyrir að einungis hluti flugumferðarstjóra hafi átt að vera áfram við störf. Í dagblöðunum Tímanum og DV hafi komið fram að tilgangur framlengingar uppsagnarfrests hluta flugumferðarstjóranna hafi verið að halda uppi nauðsynlegri flugumferðarþjónustu, tryggja flugöryggi ásamt því að hefja þjálfun nýrra starfsmanna.

Frávísunarkrafa stefnda er hér til úrlausnar.

Af hálfu stefnda er frávísunarkrafan rökstudd með því að með dómi Félagsdóms frá 22. maí 1987 í málinu nr. 3/1987 hafi verið kveðið upp úr um það að störf flugumferðarstjóra væru þess eðlis að þau féllu alfarið undir 3. tölulið 1. mgr. 19. gr. laga nr. 94/1986 um kjarasamninga opinberra starfsmanna. Að gengnum þeim dómi hafi verið birtar skrár samkvæmt 2. mgr. 19. gr., sbr. auglýsingar nr. 41/1988, 53/1990, 31/1991 og 27/1992. Hafi allir flugumferðarstjórar verið taldir falla undir ákvæði 3. töluliðs 1. mgr. 19. gr. laganna.

Stefndi telur að með dómi Félagsdóms 25. september 1995 í máli nr. 3/1995 hafi þegar verið dæmt um það ágreiningsatriði aðila málsins hvort flugumferðarstjórar væru með auglýstri skrá nr. 68/1995 réttilega taldir falla undir ákvæði 3. töluliðar 1. mgr. 19. gr. laga nr. 94/1986. Ekki hafi verið birt ný skrá samkvæmt 2. mgr. 19. gr. heldur hafi skráin frá 1995 framlengst sjálfkrafa og sé í gildi nú. Lokamálsliður 2. mgr. 19. gr. kveði á um að ágreiningur um breytingar á skrá skuli lagðar fyrir Félagsdóm sem skeri úr honum til fullnustu. Engar breytingar hafi verið gerðar á skránni. Félagsdómur hafi skorið úr um það að störf flugumferðarstjóra eins og þau eru tilgreind í auglýstri skrá nr. 68/1995 séu þess eðlis að falla alfarið undir 3. tölulið 1. mgr. 19. gr. Stefndi telur að þar sem þegar hafi verið dæmt um sakarefnið og raunar sömu kröfu og stefnandi geri nú á hendur stefnda verði að vísa málinu frá Félagsdómi samkvæmt 2. mgr. 116. gr. laga nr. 91/1991 um meðferð einkamála, sbr. 69. gr. laga nr. 80/1938 um stéttarfélag og vinnudeilur.

Við munnlegan málflutning um frávísunarkröfuna var því haldið fram að dæmt hafi verið að allir flugumferðarstjórar séu við störf sem séu þess eðlis að falla undir 2. mgr. 19. gr. laga nr. 94/1986. Félagsdómur eigi aðeins að fjalla um breytingar á skrá.

Mótmæli stefnanda við frávísunarkröfu stefnda.

Af hálfu stefnanda er því haldið fram að viðbúnaðaráætlun Flugmálastjórnar vegna fjöldauppsagna flugumferðarstjóra beri með sér það mat flugmálayfirvalda að einungis þurfi 32 flugumferðarstjóra af 82 til þess að halda uppi flugumferðarþjónustu og tryggja flugöruggi. Á hinn bóginn komi það einnig margoft fram í viðtölum við forsvarsmenn flugmála að hagkvæmni flugstjórnarinnar minnki við fækkun flugumferðarstjóra. Stefnandi telur að skilyrði laga um nauðsynlegustu öryggisgæslu sé alls ekki fullnægt þótt hagkvæmni flugumferðarstjórnar minnki á meðan á kjaradeilu stendur. Fram hafi komið að brottfall 50 af 82 flugumferðarstjórum stefni flugöruggi ekki í voða. Stefnandi telur að flugumferðarstjórar séu ekki með réttu á lista fjármálaráðherra og með athöfnum sínum og yfirlýsingum hafi flugmálayfirvöld viðurkennt þann skilning stefnanda.

Af hálfu stefnanda var því haldið fram að málið snúist um það hvort meginreglan um verkfallsrétt opinberra starfsmanna eigi við um flugumferðarstjóra eða ekki. Ef fallist yrði á skoðun stefnda þá eigi stefnandi þess aldrei nokkurn kost að hreyfa andmælum við skrá samkvæmt 19. gr. laga nr. 94/1986 svo framarlega sem stefndi haldi skrá óbreyttri, þ.e. að allir flugumferðarstjórar skuli vera undanþegnir verkfallsrétti.

Af hálfu stefnanda var vakin athygli á því sem fram kemur á bls. 10 í endurriti dóms Félagsdóms í máli nr. 3/1995, að árlega hafi stefnandi átt rétt á að bera fram andmæli við framlengdri skrá og skipti ekki máli í því sambandi að stefnandi hafi ekki hreyft andmælum við auglýsingum fyrri ára.

Í þessu máli sé málsástæðan sú, að það sé sannað, að það mat að 83 flugumferðarstjórar séu nauðsynlegir, hafi breyst eða að það sé rangt. Framlögð gögn sýni að flugumferðarstjórn telji nægjanlegt að 32 flugumferðarstjórar séu við störf til þess að öryggis sé gætt.

Á árinu 1995 hafi stefnandi ekki getað byggt á því að flugumferðarstjórn teldi 32 flugumferðarstjóra nægjanlega.

Niðurstaða.

Dómkrafa stefnanda er sú, að flugumferðarstjórar verði felldir niður af skrá samkvæmt auglýsingu nr. 68/1995, sem birt var á grundvelli 2. mgr. 19. gr. laga nr. 94/1986 um kjarasamninga opinberra starfsmanna.

Í dómi Félagsdóms í máli fjármálaráðherra gegn Félagi íslenskra flugumferðarstjóra 22. maí 1987 var litið svo á að störf þeirra félagsmanna stefnanda sem störfuðu sem flugumferðarstjórar væru þess eðlis að þau féllu alfarið undir 3. tl. 1. mgr. 19. gr. áðurgreindra laga og að félagsmönnum stefnda sé því óheimilt að gera verkfall. Var þar boðað verkfall því dæmt ólöglegt.

Stefnandi máls þessa höfðaði mál fyrir Félagsdómi með stefnu, útgefinni 28. febrúar 1995, með sömu aðalkröfu efnislega og fyrir liggur í þessu máli. Með dómi réttarins 25. september 1995 var henni hafnað. Var talið að líta yrði svo á að undanþágulistarnir fælu ekki í sér viðtækari undanþágur en áður hafði verið ákveðið í ofangreindum dómi Félagsdóms frá 1987. Stefnandi hefði heldur ekki lagt fram upplýsingar um það, hvaða félagsmenn hans eða hve stór hluti félagsmanna hans vinni ekki við flugumferðarstjórn.

Í máli þessu byggir stefnandi á frétt aflutningi um viðbúnaðaráætlun flugmálastjórnar vegna fjöldauppsagna flugumferðarstjóra og telur það hafa verið mat flugmálayfirvalda að einungis þurfi 32 flugumferðarstjóra af 82 til þess að halda uppi flugumferðarþjónustu og tryggja flugöryggi. Í framlagðri frétt ríkisútvarpsins frá 19. desember 1995 er haft eftir flugmálastjóra að flugumferðarstjórum á vakt í Keflavík og Reykjavík á annatímum myndi fækka um 19 eða úr 78 í 59 þegar uppsagnir 50 flugumferðarstjóra tækju gildi um áramótin. Á sama dóm skjali kemur fram að forseti IFATCA, Preben Lauridse „efast mjög um að hér verði nægilega margir á vakt þann 1. janúar til að framkvæma viðbúnaðaráætlunina.“ Viðbúnaðaráætlun þessi kom aldrei til framkvæmda með því að samningar höfðu tekist áður. Framangreind málsástæða leiðir ekki rökrétt til þess að unnt sé að taka dómkröfu stefnanda til greina.

Gögn málsins eru að mestu frásagnir fjölmiðla um meira og minna ósamhljóða skoðanir manna um tilvik af öðru tilefni en hér ræðir um. Verða þau ein sér ekki lögð til grundvallar í dómsmáli sem þessu, heldur þarf að liggja fyrir hlutlæg úttekt á því hvaða mannafla sé þörf til þess að halda uppi nægilega traustri stjórn flugumferðar til að landið einangrist ekki um loftferðir og staðið verði við alþjóðlegar skuldbindingar. Í þessu efni er nauðsynlegt að tilgreina hvaða störfum kann að vera ofaukið á hinni umdeildu skrá, starfslýsingar og hvort og þá hvernig þau tengist flugumferðastjórn-

inni. Skrá samkvæmt auglýsingu nr. 68/1995 hefur framlengst óbreytt en um hana var dæmt í áðurgreindum dómi Félagsdóms 25. september 1995 og er málið nú í sama horfi og eftir þann dóm.

Að framangreindu virtu ber að vísa málinu frá Félagsdómi með vísan til e-liðar 80. gr. og 2. mgr. 116. gr. laga um meðferð einkamála nr. 91/1991, sbr. 69. gr. laga nr. 80/1938.

Eftir atvikum telst rétt að stefnandi greiði stefnda kr. 50.000 í málskostnað.

Ú r s k u r ð a r o r ð:

Máli þessu er vísað frá dómi.

Stefnandi, Félag íslenskra flugumferðarstjóra, greiði stefnda, íslenska ríkinu, kr. 50.000 í málskostnað.

S é r a t k v æ ð i Sveins Sveinssonar.

Aðaldómkrafa stefnda er sú að málinu verði vísað frá dómi með vísan til 2. mgr. 116. gr. laga um meðferð einkamála nr. 91/1991. Málið hefur aðeins verið munnlega flutt um þá kröfu stefnda.

Með dómi Félagsdóms frá 25. september 1995 í málinu nr. 3/1995 í milli sömu aðila var sú afstaða tekin að túlka beri 2. mgr. 19. gr. laga nr. 94/1986 á þann veg að árlega eigi stefnandi rétt á að bera fram andmæli við framlengdri skrá. Líta verður svo á að sá réttur sé til staðar hvort sem skráin hafi óbreytt verið lögð fram eða á henni verið gerðar breytingar. Þannig á stefnandi við hverja framlagningu skrárinnar rétt á að fá dæmt um gildi hennar.

Sú fullyrðing stefnda, að með fyrrnefndum dómi hafi verið dæmt um það ágreiningsatriði aðila sem nú liggi fyrir, er ekki nægilega rökstudd. Í máli þessu hafa verið lögð fram önnur gögn og upplýsingar um afstöðu flugmálayfirvalda til nauðsynlegustu mönnunarþarfa við flugumferðarstjórn en gert var í fyrra máli og nýjar málsástæður verið bornar fram. Á stefnandi rétt á að fá afstöðu Félagsdóms til þeirra.

Að þessu virtu tel ég að hafna eigi frávísunarkröfu stefnda og tel að málið eigi að fá efnislega meðferð fyrir dóminum.

Dómur Hæstaréttar 6. maí 1997.

Mál þetta dæma hæstaréttardómararnir Haraldur Henrysson, Guðrún Erlendsdóttir, Hjörtur Torfason, Hrafn Bragason og Pétur Kr. Hafstein.

Sóknaraðili skaut málinu til Hæstaréttar samkvæmt heimild í 1. tl. 67. gr. laga nr. 80/1938 um stéttarfélög og vinnudeilur með kæru 15. apríl 1997, sem barst Hæstarétti 22. sama mánaðar. Krefst hann þess, að hinum kærða úrskurði verði hrundið og lagt verði fyrir Félagsdóm að dæma málið að efni til. Þá krefst hann kærumálskostnaðar.

Varnaraðili krefst þess, að úrskurður Félagsdóms verði staðfestur og sér dæmdur kærumálskostnaður.

Hinn kærði úrskurður er á því byggður, að málatilbúnaður sóknaraðila fullnægi ekki skilyrðum e-liðar 1. mgr. 80. gr. laga nr. 91/1991 um meðferð einkamála. Með skírskotun til forsendna úrskurðarins verður hann því staðfestur.

Sóknaraðili skal greiða varnaraðila kærumálskostnað, svo sem greinir í dómsorði.

D ó m s o r ð:

Hinn kærði úrskurður er staðfestur.

Sóknaraðili, Félag íslenskra flugumferðarstjóra, skal greiða varnaraðila, íslenska ríkinu, 25.000 krónur í kærumálskostnað.
